



# BOLETÍN MUNICIPAL

nº 3 | ano 2013

Máis Información

www.delriofoto.es



Concello de Salceda de Caselas



## Saúdo do Alcalde

### Índice

- 3 Verán Cultural 2013
- 4 Salcedenses Distinguidos
- 6 Máis polas Parroquias
- 7 Máis Verde
- 8 Máis Emprego e Formación
- 10 Máis Deporte
- 11 Máis Seguridade
- 12 Máis Investimentos
- 13 Máis Moderna
- 14 Máis Solidaria
- 15 Salceda Móvese
- 16 Máis Historia

### Marcos David Besada Pérez

Din que a distancia máis curta entre dúas persoas é a palabra. O diálogo e a negociación constante son dúas das premisas fundamentais nas que se cimenta a acción de goberno dende que no ano 2007 botou a andar o novo proxecto de cambio e transformación de Salceda; un novo camiño apoiado por unha ampla maioría social e que entre todos e todas estamos a construír. Un Concello aberto, participativo, comprometido e orgulloso de seu, que defende un principio básico: Salceda de Caselas é de todos e de todas, e non duns poucos. Porque todos e todas somos Salceda. Levamos seis anos traballando con perseverancia e paixón no medio da tempestade económica, e como di o gran Nelson Mandela “todo parece imposible ata que se fai”.

En apenas seis anos acadamos varios soños co esforzo e o apoio de todas e todos. Salceda forma parte xa do selecto grupo de cidades e vilas galegas que teñen acceso a servizos da máxima calidade na maioría das súas vivendas: auga potable da presa de Eiras, Saneamento na depuradora de Guillarei, rede de cable de telecomunicacións de R, e unha nova fonte de enerxía: o gas natural. O Programa de Alimentos, o Roupeiro Municipal, os Programas de Emerxencia Social, de Apoio á Infancia... están a paliar e a axudar a aquelas familias que están a sufrir con máis rigor a crise e os recurtes doutras administracións.

E non nos esquecemos de apoiar con todas as nosas forzas aos máis de 300 salcedenses estafados polas Preferentes e Subordinadas, ás ducias que corren risco de ser desafiuzados das súas vivendas ou aos afectados pola silicose.

Hai poucas cousas máis enordecedoras que o silencio. Como xestores públicos do ben común, acreditamos na información como un dereito dos cidadáns e cidadás de Salceda que temos a obriga legal e moral de satisfacer. Este boletín municipal segue avanzando coa vocación de dar a coñecer o traballo que desenvolvemos as 24 horas do día dos 365 días do ano, tantas veces descoñecido e silenciado.

Sabemos que, pese a todas as conquistas acadadas no concello, hai moito que mellorar e facer. Con transparencia, con honestidade e dando conta dos nosos acertos e dos nosos erros, imos a seguir a construír todos xuntos a Salceda que soñamos, gran a gran, pasiño a pasiño.

Boas Festas, e un saúdo agarimoso.

EDITA  
Concello de Salceda de Caselas

COORDINACIÓN E FOTOGRAFÍA  
Gabinete de prensa do Concello de  
Salceda de Caselas

DESEÑO E MAQUETACIÓN  
magenta axencia de publicidade

IMPRESIÓN  
Bolfer Artes Gráficas

D.L. VG 659-2010



## Verán Cultural 2013

### SÁBADO, 29 DE XUÑO

10:00 Marcha ciclista "Con casco sobre rodas". Saída do Parque da Gándara. (Organiza: Club Ciclista Aragonta).

### MARTES, 02 DE XULLO

22:30 Factory dance. Exhibición baile. Parque Aragonta.

### MÉRCORES, 03 DE XULLO

19:00 Relaxándose en familia. A Devesa. (Inscripción)  
22:30 As Sircópatas, Circo na Rúa: "Polos pelos". Parque Aragonta.

### XOVES, 04 DE XULLO

22:30 Centro Cultural O Rubal (Picoña). Praza do Concello.

### VENRES, 05 DE XULLO

19:00 Contos de sobremesa. Casa da Cultura.  
21:30 Teatro Inestable (Compañía teatral da Escola Xerpo).  
"Ubú Rei". Auditorio.

### LUNS, 8 DE XULLO

18:00 Deporte na rúa. Baloncesto (Club Baloncesto Caselas).  
Praza do Concello.

### MARTES, 09 DE XULLO

18:00 Festa da espuma. Praza do Concello.  
22:30 Odaiko Percussion Group: "Galician on board".  
Praza do Concello.

### MÉRCORES, 10 DE XULLO

19:00 As dúbidas dos animais. Casa da Cultura.  
22:30 Maxia: Mago Marco. Praza do Concello.

### XOVES, 11 DE XULLO

18:00 Roteiro "coñecendo en familia". Saída Igrexa Sta. Mª.  
22:30 Centro Cultural San Xorxe. Praza do Concello.

### VENRES, 12 DE XULLO

18:00 Deporte na rúa. Balonmán (Club Balonmán Caselas).  
Praza do Concello.  
21:30 Escola de teatro Xerpo: "Os mortos factúranse".  
Auditorio.  
23:00 Festival "Vaia Cristo": Batemento, Roky SZ, A.P.I.S.A.  
e Arado Metálico. Pavillón de Deportes Municipal.

### SÁBADO, 13 DE XULLO

12:00 Escola de teatro Xerpo: "Mocosos mortos de risa".  
Auditorio.  
20:00 Teatro Osiris. Grupo infantil: "Tufo". Auditorio.  
21:30 XXII Certame de bandas de música.  
Praza do Concello. Banda Municipal de Ribadumia //  
Agrupación Musical de Belesar // Banda Cultural de Salceda

### DOMINGO, 14 DE XULLO

22:00 Carlos Blanco ao vivo... (de momento). Auditorio.  
Venta de entradas anticipada na Casa da Cultura.

### LUNS, 15 DE XULLO

18:00 Deporte na rúa. Loita (EDM). Parque Aragonta.  
22:30 C.C. do Borralliño (Soutelo). Praza do Concello.

### MARTES, 16 DE XULLO

19:00 Cantacontos. Casa da Cultura.  
21:30 Teatro Osiris. Adultos: "Old Saybrook". Auditorio.  
22:30 C.C. O Coto (Budiño). Praza do Concello.

### MÉRCORES, 17 DE XULLO

17:00 Tarde de inchables. Praza do Concello.  
21:45 Exhibición taekwondo. Club YIDAM. Parque Aragonta.  
22:00 Festival folclórico. Parque Aragonta.  
Castro Barreiro // Xunco // O Serán // Entenza

### XOVES, 18 DE XULLO

18:00 Deporte na rúa. Multideporte (EDM). Praza do Concello.  
22:30 Agrupación Cultural Xunco (Parderrubias).  
Praza do Concello.

### VENRES, 19 DE XULLO

20:00 Master Class de tai chi. Parque Aragonta.  
21:30 Escola de teatro Xerpo: "Morte". Auditorio.  
22:30 Concerto: "Musical Moxenas". Praza do Concello.

### SÁBADO, 20 DE XULLO

Dragon Market. Feira de Artesanía. Parque Aragonta.  
9:58 e 17:59 Parque de agrupamento do Rally Surco.  
Praza do Concello.  
20:30 Desfile. Agrupación gaiteira de Salceda.  
22:00 IV Estourazo de inicio das festas. Casa da Cultura.  
Convidado: Caselas F. C.  
23:59 Verbena con "Novo Estilo". Praza do Concello.

### DOMINGO, 21 DE XULLO

11:45 Acto civil homenaxe a salcedenses distinguidos.  
12:30 Misa cantada pola Coral de Santa María.  
13:30 e 21:00 Concertos da Banda Xuvenil de Xinzo.  
22:00 Verbena con "Nebraska" e "Compostela".

### LUNS, 22 DE XULLO

17:00 Ludoteca itinerante. Xogos tradicionais en familia.  
Parque da Gándara.  
20:00 Inauguración "Expoanimalia". Auditorio.  
22:00 Verbena con "Trébol" e "América S. L."

### E ADEMÁIS...

Exposicións  
"O patrimonio marítimo de Galicia". Do 8 ao 21 de xullo. Auditorio.  
"Coidando o noso mar". Do 8 ao 29 de xullo. Casa da Cultura.  
"Expoanimalia". Do 22 ao 28 de xullo. Auditorio.  
+deporte  
Torneo fútbol 3. (Inscripción previa) Do 2 ao 4 de xullo. 18:00. Campo  
do Parque da Gándara.  
Torneo fútbol sala. Do 25 ao 28 de xullo. Pavillón.



## Salcedenses Distinguidos 2012

Acto "Salcedenses Distinguidos", xullo de 2012, na Praza do Concello

O pasado ano 2012 estreamos un novo acto coa pretensión de que pase a ser unha cita ineludible na programación das Festas do Cristo: Salcedenses Distinguidos.

Queremos que os protagonistas sexan os e as salcedenses. Persoas anónimas, normais, que atopamos no supermercado ou na froitería, pero sobre todo, persoas cunha historia que contar, da que todos e todas temos moito que aprender, como Esperanza, Concha e Isabel, veciñas do noso pobo cunha longa vida ás súas costas, chea de alegrías e de penas, de bos e malos momentos, de anécdotas que nos terían horas embobados, e que decidimos que tiñan ben merecido ser as primeiras homenaxeadas.

Este é un acto dos veciños e veciñas, polo tanto aberto ás propostas que queirades facer. Propoñémosvos que nos comentedes esas vidas e esas historias dignas de homenaxe. Porque estamos seguros que salcedenses a quen homenaxear hai moitos e queremos establecer un novo capítulo na historia de Salceda que quede para que as vindeiras xeracións poidan coñecer un pouco máis da vida dos seus antepasados.

Agradecemos unha vez máis ás familias de Concha, Esperanza e Isabel, que o ano pasado nos abriron as súas casas dende o primeiro momento e que nos prestaron toda a colaboración precisa para prepararlles a mellor das homenaxes á súa nai, á súa avoa, á súa bisavoa, ás mulleres que construíron estas grandes familias con esforzo e con traballo.



ISABEL FERNÁNDEZ MÉNDEZ  
1912 – 2012. Parderrubias

*Casou e tivo tres fillos, seis netos e dez bisnetos.*

*Traballou toda a súa vida no campo.*



CONCEPCIÓN ÁLVAREZ GROBA  
1910-2013. Cabreira

*Casou e tivo oito fillos, dezaseis netos e quince bisnetos.*

*Traballou durante 47 anos como peixeira e cociñeira, e tamén no campo de xornaleira.*

*Escribía e recitaba poesía.*



ESPERANZA NÚÑEZ CABALLERO  
1912 – 2013. A Pedra

*Casou e tivo dúas fillas, cinco netos e catro bisnetos.*

*Xunto co seu home foi a propietaria dun dos primeiros cafés do municipio, que hoxe en día é o Bar Caselas.*



2013

#### ANUNCIA FERNÁNDEZ SESTELO

Nada o día 17 de maio de 1921 na Feira. Solteira. Tivo un fillo que morreu ós poucos días de nacer. Durante moitos anos foi a parteira principal de Salceda, acudindo a centos de partos por todas as parroquias. Acudían tamén a ela para poñer inxeccións.

*"Para os partos chamábanme de tódalas parroquias, daba igual que fose de día, de noite, festivos... Non podería dicir cantos nenos e nenas axudei a nacer"*

EMILIA FELICIDAD PÉREZ GONZÁLEZ  
Nada o 14 de decembro de 1914 en Guillarei (Tui), pero tras quedar orfa foi vivir coa súa irmá a Soutelo. Casou con Alonso Calvo, co que tivo dúas fillas. Actualmente ten catro netos, seis bisnetos e unha tataraneta. Traballou no campo e fixo tamén de parteira. Ademais moitos acudían a ela para por inxeccións. En decembro de 1958, abriu a "Tenda 59" que actualmente é o "Bar 59" en Soutelo, xunto co seu marido.

*"O meu marido facía tamancas, e cando xuntaba un cento delas eu ía co carro a vendelas a Vigo ou a Porriño"*

*"Como non había quen puxese inxeccións e traer o médico a casa era moi caro, eu aprendín a poñelas e viñan chamarme a calquera hora para iso. Incluso vacinei a moitos nenos. A min non me daba medo facelo"*

#### MANUEL VALCÁRCEL OZORES

Nado o 27 de xullo de 1917 en Salceda de Caselas. Durante o seu matrimonio tivo tres fillas. Actualmente segue a vivir en Salceda e ten sete netos e tres bisnetos. Traballou sobre todo como xornaleiro e de carpinteiro, e tamén puña inxeccións, aínda que se lle lembra fundamentalmente por ser o maquinista do cine Caselas.

*"Do que máis me acordo é do estreo da Paixón. Había unha escena de choiva e nun momento de silencio, unha señora dixo "ai, meu Deus, como chove e os meus pundonciños fora". As cintas eran moi malas e ás veces rompían, así que eu quedábame pechado na sala de control ata que se fosen todos, porque me botaban a min as culpas. A min o cine non me gustaba. Eu estaba alí e sufría. A maior sorte é poder contar hoxe a miña historia"*

## 106.010€ en obras rurais

O Concello de Salceda de Caselas conseguiu 106.010,30€ dun máximo de 150.000€ que a Axencia Galega de Desenvolvemento Rural (AGADER) concede a proxectos dinamizadores de áreas rurais.

Os elementos do Patrimonio Histórico e Cultural forman parte da nosa cultura e historia, por iso o Concello segue traballando na súa recuperación, como se está a facer cos muíños.

### 1 MUÍÑO DO CUBO E DA TOL, SANTO ESTEVO DE BUDIÑO



Esta intervención é relevante por estar situados na Senda dos Humedais, que conecta co espazo declarado como Lugar de Interese Comunitario pola REDE NATURA 2000 Ribeiras do Louro no noso Concello.

Contía subvencionada 29.412,66€.

Contía total 43.646,54€.

### 2 ÁREA RECREATIVA NO REGUEIRO (STO. ESTEVO)



Transformouse esta área degradada, restaurando a fonte, recuperando o regato natural, realizando un paso no regato, e acondicionando o entorno coa plantación de especies autóctonas.

Contía subvencionada 33.947,30€

Contía total 47.197,21€

### 3 CRUCEIROS DE MACEIRA (PARDERRUBIAS) E FONTE DA PEDRA (SANTA MARÍA)



Adoquinado, limpeza, reconstrución dun muro e colocación de arborado, dous focos de luz e panel histórico do Cruceiro de Fonte da Pedra. O cruceiro de Maceira acondicionouse, a través de adoquinado combinado con cemento, limpeza, alumeado e panel interpretativo.

Contía total 22.818,16€.

Contía subvencionada 18.884,31€.



A recuperación da flora ripícola, así como a súa conservación para a acomodación da fauna endémica é un dos obxectivos que se están a perseguir xunto co restablecemento das poboacións, que permite a reaparición de troitas e outros bioindicadores do bo estado e calidade dos espazos

Máis Verde



560 metros xa están realizados, unindo As Pontes coa Ribeira (Pombal de Antero)

## Ampliamos a senda do río Caselas

O novo tramo da senda verde do río Caselas comprenderá unha lonxitude total de 1160 metros, dos que 560 xa foron realizados a través da partida dos orzamentos do 2012 dedicada á recuperación da súa marxe, a través do Proxecto "As Pontes- Robeiras-Pombal de Antero". Cun orzamento de 29.178€, sendo a empresa adjudicataria Construccións Magonfer S.L.

Os 600 metros restantes, serán executados pola Deputación Provincial de Pontevedra, segundo o que recolle o PID 2012-2013" cun orzamento total de 100.428,08€, no cal se contemplan obras de realización dunha plataforma de dous metros de ancho con bordillos, unha rampa de madeira con pasamáns, un pontillón de madeira.

Son moitos os beneficios que presentan, para a veciñanza e visitantes que se acheguen ao noso concello, a recuperación das áreas naturais como área de descanso e disfrute da natureza, así como con finalidade deportiva ou didácticas a través de actividades como aulas abertas da natureza de temática variada.

Ademais do beneficio en canto á concienciación ambiental, xa que os resultados de análises realizadas na auga da senda indican resultados negativos de contaminación e unha alta recuperación e integración do espazo, isto débese principalmente a que o río xa non é obxecto de depósito de residuos, como se viña facendo anteriormente á recuperación.



## Formación para busca de emprego

A Concellaría de Emprego e Formación presentou o seu I Ciclo do Plan de Formación Municipal de Salceda, con 630 solicitudes.

Este 1º ciclo incluíu aqueles cursos que máis se axustan aos perfís dos desempregados do municipio.

É moi importante dar resposta a demanda dos veciños e veciñas de Salceda e 630 solicitudes veñen a demostrar que vamos na liña correcta e que temos que seguir traballando para dar cabida a tódalas necesidades formativas, especialmente do colectivo de desempregados/as.

## Autoemprego cooperativo e autoemprendemento

Neste intre as cooperativas poden constituír unha oportunidade para a xeración de emprego, polo que é importante que dende as administracións se fagan este tipo de actividades. Sempre hai algún veciño ou veciña que ten un proxecto en mente, e esta pode ser a fórmula para levalo a cabo.

A xornada estivo organizada pola Concellaría de Emprego e Formación do Concello de Salceda e promovida pola Oficina de Fomento Cooperativo da Mancomunidade da Área Intermunicipal de Vigo, en coa colaboración cos Concellos de Mos, Porriño e Salvaterra de Miño.

## Apoio a autónomos e emprendedores

O CDL O Torrón acolleu varios cursos dirixidos a autónomos/as:

- Curso "Redes Sociais na Empresa".
- Curso de Ofimática Xeral nivel avanzado.

Dentro do Plan de Formación Municipal, a Concellaría de Emprego e Formación quere tamén apoiar aos autónomos tentando dar resposta a aquelas necesidades de formación útiles para o seu negocio.

## 342 alumnos en cursos

O CDL de O Torrón acolleu durante os primeiros meses do 2013 (xaneiro a maio) a 342 alumnos/as en cursos de formación:

|  |    |
|--|----|
| Busca de emprego por internet (Grupo 1)            | 15 |
| Busca de emprego por internet (Grupo 2)            | 15 |
| Busca de emprego por internet (Grupo 3)            | 15 |
| Curso básico de informática (Grupo 1)              | 15 |
| Curso básico de informática (Grupo 2)              | 14 |
| Informática Asociación de Xubilados e Pensionistas | 24 |
| Fotografía nivel básico                            | 18 |
| Fotografía nivel avanzado                          | 18 |
| Xornadas de autoemprego                            | 15 |
| Talleres e seminarios de autoemprego cooperativo   | 26 |
| Manexo da carretilla elevadora                     | 20 |
| Manipulador de alimentos                           | 26 |
| Graduado en ESO (grupo 1)                          | 32 |
| Graduado en ESO (grupo 2)                          | 31 |
| Graduado en ESO (grupo 3)                          | 35 |
| Curso básico de Protección Civil                   | 23 |

## Unha nova oferta formativa

Formación en linguas estranxeiras, economía doméstica e familiar, manipulador de produtos fitosanitarios, área de administración, atención ao cliente ou loxística, son algunhas das posibles ofertas nas que está a traballar a Concellaría de Emprego e Formación.

Ademais deste investimento propio, dende a Concellaría estanse a solicitar tódalas accións formativas doutras administracións, e espérase que este ano nos concedan algunhas delas para poder ofrecerlle os nosos veciños un catálogo máis amplo que cubra todas as necesidades nesta área.

SOMOS UNHA CONCELLERÍA EN MOVEMENTO E DINÁMICA!

Estamos na web:

[www.salcedadecaselas.es](http://www.salcedadecaselas.es) (tenencia de alcaldía - emprego e formación)

E nas redes sociais:

[www.facebook.com/concelleriadeempregoeformacion.salceda](https://www.facebook.com/concelleriadeempregoeformacion.salceda)



Vista exterior despois do novo acondicionamento do CDL O Torrón realizado no 2012 -2013

## Viveiro de empresas propio


É un logro para un concello do tamaño de Salceda de Caselas, dispor dunha infraestrutura deste tipo. Os viveiros de empresas son necesarios para fomentar o autoemprego, como saída para que moitos desempregados volvan a traballar. Este Viveiro de Empresas xa está a disposición de todos aqueles emprendedores que queiran presentar o seu proxecto. Terán os servizos de estudo de viabilidade da súa idea empresarial, información e tramitación de subvencións e axudas, asesoramento na xestión da empresa durante o primeiro ano de actividade e cesión de oficinas equipadas; ademais de dispoñer do resto de zonas comúns do edificio.

Non debemos esquecer que as pequenas empresas e os autónomos son o verdadeiro motor da nosa economía, en consecuencia debemos facilitar a creación deste tipo de empresas.

Os usuarios do CDL terán a súa disposición: Sala de Xuntas, Salón de Actos, Aula de Formación, Aula de Novas Tecnoloxías, Aula Ebanistería, Zona de Esparcemento, Servizo do Técnico de Emprego e Orientación Laboral e próxima posta en funcionamento dunha Aula de Formación na rama hostaleira.

## Persoas que visitaron o CDL "O TORRÓN"

Período xaneiro-maio 2013



## O CDL "O TORRÓN" pasa a formar parte da rede CeMIT

A Concellería de Emprego e Formación ven de firmar o convenio de colaboración coa Xunta de Galicia para formar parte da Rede de Centros para a Modernización e Inclusión Tecnolóxica de Galicia (Rede CeMIT).

Será a Aula de Novas Tecnolóxicas a que albergará este Plan de Formación da rede CeMIT dentro das súas instalacións, ademais a concellería de emprego e formación achegará a infraestrutura deste centro para a realización de todas as actividades do catálogo de servizos ou do Plan de Formación de Amtega (Asociación para a Modernización Tecnolóxica).

Consideramos moi importante promover o uso das novas Tecnoloxías da Información e a Comunicación na poboación, facendo especial fincapé naqueles colectivos onde esta falta de coñecementos faise máis evidente. O principal obxectivo é proporcionar plans de formación adecuados ás novas demandas tecnolóxicas.

## Aula mentor

Nace co obxectivo de ofrecer a todas as persoas maiores de dezoito anos a posibilidade de adquirir, actualizar ou ampliar os seus coñecementos e aptitudes para o desenvolvemento persoal e profesional, facendo especial fincapé na inserción laboral das persoas desempregadas. Trátase dunha oferta educativa ampla e diversificada dirixida ás persoas adultas, ata o de agora só ofertada en Vigo.

Máis Deporte

EDM C. BALONMÁN CASELAS



C.C. ARAGONTA



F.C. CASELAS



C. BALONCESTO CASELAS

### Campamentos de verán

As Escolas Deportivas Municipais xunto coa Concellería de Deportes van levar a cabo por terceiro ano consecutivo os Campamentos de Verán. Trátase dun campamento urbano para nenos e nenas de 3 a 12 anos durante os meses de xullo e agosto.

Un campamento multidisciplinar, con actividades deportivas, obradoiros e xogos. Poden facer deportes como piragüismo, rugby, badminton, loita olímpica, sendeirismo e actividades como obradoiros de velas, carteiras, festa de Entroido, etc.

É unha resposta a demanda das familias de conciliación da vida laboral e familiar para que as poidan continuar no verán coas súas tarefas laborais, de aí que existan estes dous servizos a maiores: aula matinal e comedor para quen os poida necesitar.

109 rapaces e rapazas participaron nestes campamentos no verán do 2012 e estímase que esta cifra medrará este ano.

### Cursos de natación

124 rapaces e rapazas tiveron a ocasión de participar nos cursiños de natación no 2012 na Piscina Municipal de Salceda. Este ano repítese a iniciativa da Concellería de Deportes para o verán.

### Somos futuro

Detrás de Pavillón Municipal vanse construír 2 pistas de 22x44 metros para a práctica deportiva exterior: baloncesto, tenis, balonmán, futbito, etc. cun investimento de 129.000€.

O aumento da poboación infantil e xuvenil en Salceda marca a necesidade de proporcionarlle instalacións para crear hábitos de vida saudables. Obras deste tipo manteñen postos de traballo, xa que a inversión crea emprego, que é a maior iniquedanza dos veciños e veciñas.

### I 10k Concello de Salceda

Un total 858 atletas repartidos nas distintas carreiras percorreron 10.000, 2500, 1000, 500 e 150 metros, segundo a categoría na que participaban.

A carreira absoluta, que tivo a súa saída ás 10:30 horas, percorreu 10.000 metros por varias das parroquias do concello ademais de parte do casco urbano. Nesta carreira absoluta os mellores tempos foron para Santiago López Rodríguez (31,47 min) e no caso das fémias para Ariana González Verde (42,06 min). No caso da mellor salcedense nas categorías absolutas, Davinia Vaqueiro Martínez fixo un tempo de 45,09 min.

No resto das carreiras participaron rapaces nados entre os anos 1998-2000 (categoría A-2500 metros), do 2001-2003 (categoría B-1000 metros), nados entre o 2004-2006 (categoría C - 500 metros) e do 2007-2011 (categoría Pitufos - 150 metros).

En total entregáronse 60 trofeos nas distintas categorías da carreira absoluta e 48 trofeos nas categorías menores.





Máis Seguridade

## Posta a punto dos coles

Dende as Concellarías de Ensino e Vías e Obras trabállase continuamente no mantemento e mellora dos centros escolares do municipio.

No caso do CRA Raíña Aragonta realizáronse pintados en diversas aulas, melloras nos patios, reparacións de tellados, eliminación de humidades... Tamén se levou a cabo a instalación dun novo equipo de calefacción na aula de Barreiro, que garante unhas boas condicións para os nenos e nenas con un notable aforro enerxético.

No CEP Altamira leváronse a cabo diversas obras solicitadas polo equipo directivo. Dividiuse unha aula para ser empregada por pequenos grupos con necesidades especiais e procedeuse á construción dunha rampla que facilite o acceso ás persoas con discapacidade. Realizouse tamén un novo acceso ao recinto, separando a saída dos nenos e nenas que empregan o autobús dos que chegan camiñando, evitando así as situacións de risco que se producían con dúcias de cativos saíndo polo medio dos autobuses. Procedeuse tamén ao acondicionamento de diversos puntos do patio exterior, incluíndo a canalización de augas nas zonas máis complexas. Por último, en colaboración coa ANPA do centro e co mesmo colexio, colocouse unha cuberta na zona de organización dos nenos e nenas que van en autobús, que nos días de choiva facilita a espera.



## Mellorando o Auditorio

O obxectivo principal foi o de adaptar o edificio ás normas de seguridade. Para iso abriuse unha nova porta de emerxencia dende o salón de actos que dá directamente ao exterior do edificio, sen pasar polos corredores, posibilitando así unha máis rápida evacuación en caso de incendio ou de calquera outro incidente. Procedeuse ao cambio de tódalas barandillas existentes tanto no hall como na rampla de acceso ao edificio, pois estas tampouco cumprían a normativa de seguridade ao ser “escalables”, supoñendo así un perigo fundamentalmente para os cativos que se divertían subíndose a elas. Na obra primouse a reciclaxe de elementos, e así arquitecto e construtor traballaron na reutilización dos materiais da barandilla para a construción dunha nova que si cumpriase coas normas de seguridade. Tamén habilitamos un espazo para dúas cadeiras de rodas dentro do salón de actos.

As obras contaron cun orzamento de 27.854,34 €, que se asumiron con fondos propios, agás 6.664,15 € que foron financiados pola Consellería de Cultura da Xunta de Galicia.

Estamos a falar de medidas de seguridade para o cal todos os esforzos son necesarios. Preocupábanos a evacuación do salón de actos do Auditorio en caso de emerxencia, e con esta nova saída será moito máis fácil unha evacuación de emerxencia chegado o caso.

## Obras na Paxariña e Parderrubias

O convenio entre o Concello de Salceda e a Consellería de Medio Rural permitiu a execución das obras nas estradas da Paxariña e da Lavandeira cunha partida total de 77.0156,95€, sendo a empresa adxudicataria TRAGSA.

Na actualidade é complicado mellorar todas as estradas do municipio, pero na medida das súas posibilidades o Concello traballa para garantir unhas boas comunicacións intramunicipais.

As obras da Paxariña, no Barrio de A Feira, consistiron na reposición da capa de rodaxe nunha lonxitude de 604m., nunha estrada en moi malas condicións, que dificultaba a condución.

A estrada da Lavandeira-Igrexa en Parderrubias permitirá a mellora dos accesos, así como unha conexión viaria máis directa cos barrios do Piñeiro e A Portela.

## Saneamento en Budiño

A obra conta cunha inversión de 1.521.321,40 €, o que a converte na maior obra de saneamento realizada na historia de Salceda. Consta da instalación de 6,6 km de colectores. O prazo de execución é de 8 meses.

A rede dará servizo á zona industrial do Cerquido e a unhas 130 vivendas de Budiño dos barrios de Rubindo, Bouzapanda, A Lomba, A Urgueira e O Cerquido. Eliminará as verteduras ás Gándaras do Cerquido, espazo protexido no Rede Natura 2000.

A Consellaría de Medio Ambiente, Territorio e Infraestruturas aprobou a colaboración técnico-financieira da Xunta de Galicia para a execución deste proxecto no Consello da Xunta do 21 de xuño do ano 2012. Trala licitación do proxecto resultou adxudicataria a empresa Fomento de Construcións e Contratas (FCC). O Proxecto definitivo, tras sucesivas modificacións dende febreiro do 2009, foi aprobado no Pleno de Salceda o 28 de outubro do 2011.

Por fin se vai a executar unha obra importantísima para Salceda, xa que desta maneira quedará saneada a única zona industrial do Concello, a Área Industrial do Cerquido, onde as empresas tiñan, dende hai tempo, varias advertencias da Confederación Hidrográfica para cancelar as verteduras que se producían ao río Tinto e ao río Louro, e boa parte das vivendas da parroquia de San Estevo de Budiño.



Obras da Paxariña, no Barrio de A Feira

Máis  
Investimentos

## Inventario de Viais e Camiños

Por fin contamos cun Inventario Municipal de Viais e Camiños públicos que será a base para a definición dos núcleos no PXOM. A súa finalidade é coñecer as características de anchura, lonxitude e pavimentación de todos os viais públicos, e saber o número de luminarias e instalacións de auga e saneamento coas súas coordenadas. Isto vai permitir, por unha banda, axilizar a concesión pública das licencias municipais e pola outra, a mellora de servizos non municipais como o reparto de correspondencia e mensaxería, a través da prenumeración, que permitirá obter a numeración definitiva das vivendas.

Co inventario recupérase a toponimia dos 530 camiños e viais públicos municipais, recollendo a través dun documento público o nome histórico dos mesmos, polo que os veciños e veciñas os coñecían dende fai moitas décadas.


A empresa adxudicataria foi Laya S.L. e o orzamento total ascendeu a 19.234 euros.

Dende o Concello agradecen a implicación dos veciños e veciñas de Salceda que traballaron na realización do inventario, facilitando datos para coñecer o nome dos viais e camiños municipais, clave para desenvolver o traballo.

É moi importante garantir unha maior seguridade xurídica na concesión de licencias, ademais de axilizar o proceso de concesión. O noso Concello nunca contou cun inventario de viais e camiños públicos municipais dende a súa existencia que ven datada do ano 1836. Este proxecto é ambicioso e necesario para que o Concello rexistre as súas propiedades.



Máis Moderna



## Os nosos residuos

Para aforrar no servizo de recollida de residuos, o Concello organiza unhas charlas informativas para explicar cómo se debe de separar o lixo que xeramos nas nosas vivendas e cal é o camiño que seguen os residuos nas correspondentes plantas de reciclaxe. Sortéanse 30 composteiros entre os asistentes, para facilitar a compostaxe caseira do lixo orgánico, un maravilloso abono natural para as hortas.

O Concello conta con medios propios para realizar a recollida de lixo do contedor verde. Este servizo supón un custe de 380.320€ anuais, dos que só se cubre o 40 % a través da recadación aplicada aos veciños e veciñas. Este custe reduciríase se todas e todos botásemos cada residuo no seu contedor correspondente. Así, só pagaríamos a recollida de cartón, que veñen sendo 8.500€ anuais. A recollida de vidro e plásticos son gratuítos.

## Gas Natural

A obra de canalización de gas natural polas rúas da Esfarrapada permite o subministro de gas natural a máis de 4.000 habitantes para usos domésticos e comerciais, e inclúe a utilización do gas en institucións públicas como Colexios ou o novo Centro de Saúde. Cun orzamento de 1.703.428 €, a empresa encargada de levar a cabo a súa execución foi ELECINOR S.A.

## R

A instalación de cable de fibra óptica no centro da vila, que promove a empresa R, sitúa a 4.000 persoas ao máis alto nivel de dotación en infraestruturas tecnolóxicas.

A obra contou cun investimento de 286.845€.

Salceda de Caselas entrará no grupo de cidades e municipios galegos que dispoñen de conexión directa coa rede de telecomunicacións da última xeración que R está a despregar na comunidade autónoma para que tódolos galegos e galegas poidan recibir servizos integrados de telefonía, televisión e internet.

Consideramos moi importante que os veciños e empresas da vila poidan contar cun servizo de telecomunicacións de última xeración e que ademais sexa satisfeito por unha empresa galega comprometida co País.

## Auga

Salceda xa está conectada á rede de auga de máxima calidade que provén do embalse do Oitavén. Grazas a isto, máis de 2.200 vivendas, comercios e empresas vanse abastecer deste novo subministro.

Previamente o Concello de O Porriño aprobou a concesión de 20 l/s de caudal hidrolóxico ao Concello de Salceda de Caselas en sesión plenaria do día 22 de abril do ano 2004.

O custe da obra ascendeu a 1.604.164€ e foi executada pola empresa CRC Obras y Servicios. A empresa pública de Obras e Servizos Hidráulicos achegou un 83,33% do financiamento e o Concello de Salceda de Caselas contribuíu cun 9,53%, que supón unha achega de 200.030 euros, participando o Concello do Porriño co 7,14%.

Cúmprese un soño: a maior obra hidráulica da historia de Salceda, vai garantir o subministro de auga de calidade, o gran obxectivo deste goberno municipal dende hai anos.

Este era un proxecto de vital importancia para Salceda, debido ao incremento de poboación nun concello que tiña unhas instalacións obsoletas e insuficientes. O Concello agradece a todos e todas os que fixeron posible este soño, principiando polo pobo do Porriño e o seu Concello, a Comunidade de Montes de San Xurxo e Parderrubias que cederon os terreos para a construción do depósito, e por suposto a Augas de Galicia e á empresa CRC.

## FLASHMOB SOLIDARIO

350 Kg. de tapóns a favor do Banco de Tapóns do BaixoMiño. Unha iniciativa altruísta de Eva "Piruleta".



## O GRUPO DE GOBERNO DOA AS SÚAS PAGAS

O grupo de goberno ten aberta unha conta bancaria na que se depositou o importe das pagas de Nadal. O Real Decreto-Lei 20/2012 do 13 de xullo do Goberno do Estado deixou sen paga extra no Nadal aos traballadores públicos. Esta medida non afecta aos cargos políticos, pero o equipo de goberno de Salceda decidiu solidarizarse cos empregados municipais doando a súa paga de xeito voluntario. Con ese fondo estase contribuíndo con diversas causas sociais, entre elas o "Programa de alimentos" do Concello. Os colectivos máis desfavorecidos polas políticas de recortes que están a levar a cabo os gobernos Central e Autonómico están xa a recibir axuda do grupo de goberno de Salceda, que estuda cada un dos casos que se presenta para dedicar os fondos a aqueles máis urxentes.

## AS HIPOTECAS

A Plataforma de Afectados pola Hipoteca Vigo-Salceda-Tui realizou no Auditorio Municipal unha conferencia para tratar a estafa inmobiliaria por parte do sistema financeiro, e as consecuencias máis dramáticas: os desafuzamentos. A plataforma está cada mércores na Praza do Concello, axudando ás familias na xestión e asesoramento dos seus problemas hipotecarios. En Salceda hai 4 casos que están tramitando, e un deles chegou xa a acordo de dación en pagamento coa entidade bancaria.

A plataforma dispón dunha oficina ao lado da Policía Local. Para realizar calquera consulta ou participar activamente pódese contactar no 603424744.



## FESTIVAL SOLIDARIO ASEM

Durante 3 días puidemos disfrutar de actividades como: Carcajadas Show, Escola de Danza Paula Cobián, Charanga Divertida, Grupo Triatrerros de Vigo, etc. Os fondos foron destinados a seguir mantendo aberta a sede da asociación, que agora mesmo conta cunha traballadora social, un terapeuta ocupacional e unha administrativa. ASEM ten a súa sede en Vigo e unha delegación en A Coruña. Conta na actualidade con 342 socios.



Máis  
Solidaria

## AS PREFERENTES

O Auditorio Municipal acolleu unha charla informativa sobre a comercialización de "participacións preferentes" por parte das entidades bancarias á que asistiron afectados e colectivos diversos.

En Salceda presentáronse 227 solicitudes, das que 86 foron aceptadas por NovaGalicia Banco para resolverse mediante a arbitrase.

O pleno ordinario convocado para o 26 abril do 2013 foi suspendido por petición das persoas afectadas polas Participacións Preferentes como mostra de solidariedade do equipo de goberno.

## GRAZAS AO VOLUNTARIADO!



A Concellería de Voluntariado celebrou o Día Internacional do Voluntariado cun acto de agradecemento aos voluntarios e voluntarias da Bolsa de Voluntariado de Salceda.

É un pequeno xesto a un grande traballo. Eles fan que a nosa sociedade sexa un pouco máis xusta e solidaria.

## AGRICULTURA ECOLÓXICA

Dende o Concello realizáronse xornadas divulgativas para concienciar do equilibrio medioambiental e da mellora da calidade de vida que supón o cultivo ecolóxico. Unha charla na que Jose Piñeiro, membro da Asociación Treze Catorze e xerente dun negocio de comercialización de produtos ecolóxicos, explicou os beneficios que ten o consumo de produtos ecolóxicos na saúde.

Visitouse en Alxén a explotación ecolóxica de Antonia, onde se observou unha plantación de produtos hortícolas, seguindo un procedemento de cultivo ecolóxico.

Na visita á Finca da Corisca situada en Entenza, percorreuse a única explotación vinícola de albariño Denominación de Orixe Rías Baixas de produción ecolóxica.

Todos aqueles veciños e veciñas de Salceda que queiran realizar a súa pequena horta ecolóxica e que carecen de terreo para poder facelo, poden achegarse ao concello, para poder buscar posibles solucións con propietarios que xa non utilizan a terra para a súa produción.



Explotación ecolóxica de Antonia en Alxén

## XORNADAS DE SEGURIDADE VIAL

As I Xornadas de Educación Vial celebradas en maio acolleron a máis de 500 nenos e nenas de entre 3 e 12 anos, pertencentes ao CEP Altamira, E. I. Xoaniña, E. I. A Galiña Azul e Manus. Recibiron clases teóricas de mans da Autoescola Caselas, e fixeron prácticas no circuito establecido na Praza do Concello. Os membros da Policía Local foron os encargados de atender as clases prácticas, facendo cumprir as normas aos participantes.

As Concellarías de Tráfico e Ensino foron as encargadas de coordinar o proxecto. Ante o éxito da actividade pénsase xa nunha segunda edición o próximo ano.



Foto superior. Avituallamento nunha das andainas de "Coñece o teu Entorno"  
Foto inferior. O "Roteiro dos Pazos" celebrado o ano pasado

Salceda  
Móvese

## COÑECE SALCEDA

Temos en marcha diferentes programas para que a veciñanza teña un coñecemento paisaxístico, cultural, etnográfico e patrimonial do noso concello.

"Coñece o teu Entorno" consiste na realización de roteiros por diferentes zonas de atractivo paisaxístico. Foron percorridas todas as parroquias a través das 7 andainas, e o programa segue vixente para coñecer aquelas zonas que aínda non foron visitadas.

Para coñecer o noso patrimonio histórico realizamos o "Roteiro dos Pazos", e realizaremos en breve o "Roteiro dos Cruceiros".

A través dunha serie de xogos e probas de recoñecemento, a actividade "Coñecendo en familia" ilustra aos participantes nas diferentes especies de flora, fungos e fauna existentes nas áreas inventariadas. Para a actividade teñen que participar os cativos acompañados por un adulto. O ano pasado as nenas e nenos superaron con éxito as probas existentes en cada muíño do Parque Etnográfico do río Caselas. Este ano a temática escollida sos Humidais das Gándaras.



"Coñecendo en familia" no Parque Etnográfico do río Caselas

## RECUPERANDO A MEMORIA DO POBO

Dende a Concellaría de Cultura estase a traballar na recuperación da memoria de Salceda. Para iso recórrase ás testemuñas dos nosos maiores e de cantos consideren que teñen algo que aportar. Interesa, sobre todo, o que teña que ver coa emigración cara a América, polo que nos gustaría contar coa colaboración de emigrantes ou familiares que nos fagan chegar as súas vivencias, así como o material gráfico co que poidan contar: fotos, vídeos, prensa...

Por outra banda estase a elaborar un catálogo coa historia do folclore en Salceda: gaiteiros, bailadores, ranchos de reis... así como a historia do Doutor Zunzunegui, médico vasco que exerceu en Salceda e ao que se lle dedicou o nome dunha rúa.

Por último, o proxecto máis amplo é o denominado AMIS (arquivo da imaxe de Salceda), que pretende facer unha recollida de fotografías e imaxes da historia e as xentes do municipio: festas, paisaxes, colexios, edificios... Para todos estes proxectos resulta imprescindible a colaboración de todos e todas, polo que no edificio do Concello se habilitou unha oficina que permanece aberta tódolos mércores (mañá e tarde) para recibir tódalas colaboracións que poidan aportar os veciños e veciñas tanto de Salceda como dos arredores. Queremos plasmar a historia viva do noso pobo e gustaríanos contar coa axuda de todos e todas vós.